



БЛАГОВѢСТНИК

РОЧНИК VII. * ЧИСЛО 2. * ФЕБРУАРЬ 1927.

ОТВѢЧАТЕЛЬНЫЙ РЕДАКТОР: О. ЕМИЛІЯН БОКШАЙ

СОДЕРЖАНИЕ:

Не бойтесь! — Де знайти правду?
2. Зводки пришло бритя бороды?
3. Яка давна е вѣра, якой придер-
жуються Русини? — Нашъ листы.

Пахучая фіялка и вонячій грибъ. —
Въ оборонѣ вѣры. — Мѣсячное на-
мѣреніе на Фебруаръ. — Изъ свѣта
и Церкви. — Дописи. — Новости.

ВЫДАЕ ВЫДАВНИЦТВО ЧИНА СВ. ВАСИЛІЯ ВЕЛ. В УЖГОРОДЪ

ИЗ КНИГОПЕЧАТНІ ОО. ВАСИЛІЯН В'УЖГОРОДЪ, УЛ. РАКОВІЯ ЧИСЛО 54.

Ци ужє маєте

КАЛЕНДАРЬ „БЛАГОВѢСТИКА“?

Якъ не маєте, спѣшътъ зъ закупномъ, бо може забракнути.
Тотъ, что уже купили и перечитали, даже вдоволенъ и
дякують намъ.

Календарь „Благовѣстника“ стоить лишь 5 Кч.

Кто замовить 10 кусовъ, одержить 1 кусъ задармо!

Спѣшътъ!

Выдавництво Чина Св. Василія Великого въ Ужгородѣ

улица Раковци 54.

видало слѣдуюочъ новѣ книжки:

1. О. П. Швилинський: „Популярні Катехитичні Проповіди“ для католицького народу з нѣмецького переклав о. Др. Я. Левицький; стор. 365, форм. 12⁰. — Цѣна 20.— без пересилки.

2. „Najsvjatijšoje Serdce Spasiteľa“ korotka nauka, molityv, moleben i pisni dla členov najsvo. Serdca Isusa Christa, latinskimi bukvami. Stor. 64, form. 24⁰. — Cina Kč 1·50.

МОЛИТВЕНИКЪ для греко-каѳолицького руського народа

составленый о. П. Котовичомъ.

Сей прекрасный, богатый эмѣстомъ молитвенникъ мае 507 страницъ друку, шитый руками, оправленый въ полотно

стоить лишь 7 Кч.

Достати можна:

Книгопечатня 00. Василіянъ, Ужгородъ, Раковци ул. 54.

БЛАГОВѢСТИНИКЪ

ДУХОВНА ГАЗЕТА ДЛЯ ПОДКАРПАТСКИХЪ РУСИНОВЪ

Выходитъ 1-го кождого мѣсяца.

Адреса

Редакціѣ, администраціѣ и експедиціѣ:
Выдавництво Чина св. Василія Великого
въ Ужгородѣ, улиця Раковци число 54.

Предплата:

Въ Республіцѣ на цѣлый рокъ 10 Кч.,
за границю 17 Кч. — До Америки 0·50 (попъ) дол.
Одно число „Благовѣстника“ стоить 1 Кч.

РОЧНИКЪ VII.

ЧИСЛО 2.

ФЕБРУАРЬ 1927.

Не бойтесь!

Схизматики въ нашей нещастной религійной борьбѣ зъ наибольшимъ успѣхомъ уживали оружіе настрашеня. Нападали зъ наибольшою дикостію на гр. каѳоликовъ, палили ихъ, прозывали, кам'нями обметали, били, ранили и т. д., чтобы одстрашити ихъ одъ Церкви Христової и перевести на ересь. Розширяли всякѣ клеветы, брехнѣ, чтобы подорвати повагу нашихъ священниковъ и нашоѣ вѣры. Всягде, где лише запановала ересь, запановала она головно помочію насильствія и настрашеня. Исторія нашої краины на вѣчнѣ вѣки записала, что схизма на Подк. Руси загнѣздила не путемъ здорового розвою, але помочію брутальнихъ насильствій.

Противъ сего способу войованя треба намъ сильно стояти. Не одповѣдати подобнымъ насильствіемъ, але по примѣру Христа и первихъ христіянъ сильно, смѣло, хоробро стояти и не настрашитися. Бо не тѣ выиграютъ, котрѣ зъ мечемъ воюють, але тѣ, котрѣ не напудятася и спокойно вычекаютъ, якъ mineся буря надъ ними.

Мы христіяне, не маеме боятися. Вѣра Христова не е вѣра боязни, але вѣра мужескої хоробрости. Коли Христосъ прийшовъ на свѣтъ, лунала ангелска пѣсня: „Не бойтесь пастырѣ, оповѣдаю вамъ велику радость“. Коли Христосъ одийшовъ, такъ говоривъ до апостоловъ: „Не бойтесь, я побѣдивъ міръ...“ Апостолы смѣло выступили передъ жидами въ оборонѣ вѣры Христової, мали смѣлость и одвагу пойти межи поганъ и проповѣдати Хри-

ста. Св. Петро, сей простый рыбарь смѣвъ пойти у столицю цѣлого свѣта, въ Римъ и голосити Христа розпятого. Св. мученики смѣло и одважно ступили на арену и охотно пролляли кровь свою за Христа. Въ поведеню першихъ христіянъ, нигде не найдеме слѣду боязни, трусливости. Смѣло и одважно ишли давнѣ миссіонары навертати дикѣ племена и придобали для Христовоѣ Церкви цѣлу Европу. Зъ такою святою смѣlostю идуть и днесъ нашѣ миссіонарѣ въ чужѣ краї и не смотрячи на небезпеки, гosoять христіянску въру межи поганами. Бо Христосъ подавъ имъ духъ смѣlosti а не боязни.

Отже и мы вѣрники Христа и наслѣдники св. мучениковъ не налякаймese великого крику и насильствiя схизматиковъ. Сей великий крикъ и насильствiе е ихъ одинокимъ оружiemъ. Але никто не здѣлавъ великое и тревалое дѣло помочiю насильства. Уже и нашѣ схизматики не такъ крикливи, уже опустили свої носы видячи, что одбираютъ одъ нихъ нашѣ церкви. Уже прочунилися и видять где повели ихъ „вожды“. Уже розпадають и ширяться межи ними баптизмъ, суботництво и прочѣ ереси. Уже настала пора вытверезеня. Ся яростъ, что указуютъ при переданяхъ церквей, то геройство, что являєся въ окаменьованю гр. каѳ., то уже послѣдня дѣя въ ихъ борьбѣ. Прiйде скоро часъ, что и они увидять, что насильствiе, терроръ, то не є оружiе правдивого христіянина, але спосbъ войованя еретиковъ.

Але доти, доки прiйде сей часъ, смѣло стойме братя въ вѣрѣ и не боймese. Вы Христовѣ есьте, до васъ не ялося страхъ и боязнь, але св. смѣlostь и одвага въ оборонѣ вѣры.

ХРИСТИЯНЕ! Не забудьте, что на праздникъ „Трехъ Святителей“ збирати будуть въ всѣхъ церквахъ нашоѣ епархiѣ на христіянску прессу. Подъ христіянскою прессою розумѣеме всякѣ христіянскѣ повинки, книжки, брошурки. Най кождый христіянинъ дарує чось на сесю благородну цѣль. Христіянскѣ газеты и книжочки най успiйше боронили нашу вѣру үротивъ схизматиковъ и безбожныхъ комунистовъ. Помагайте имъ, чтобы сю борьбу за Бога и вѣру и дальше могли успiйно вести. Кождый, кто свої геллеры на сiю святу цѣль жертвую, зробить дуже милое дѣло передъ Богомъ. Въ борьбѣ за вѣру кождый має участь брати! Кто словомъ и дѣломъ не може, най помогає Боже дѣло жертвами. Най никто не одтягнеся одъ жертвованя на христіянску прессу!!

Де знайти правду?

Написавъ свящ.: ТЕОДОЗІЙ ЛЕЖОГУБСКІЙ.

(Продовження).

2. Зводки пришло бритя бороды?

— Та може Ви и правду кажете, — перервавъ хворый — але видите менъ дуже противное е се, что вашъ священники навъть у зверхномъ выглядѣ не придерживаются греческихъ звычайовъ и бриуть бороду та вуса. Се прецѣнь цѣлкомъ не по обряду. Ісусъ Христосъ та апостолы не брили бородъ.

— Что до сего, то будьте цѣлкомъ супокойнѣ — одповивъ о. Петро. — Каѳолическа Церковь нѣколи не змушувала священниковъ греческого обряду, чтобы брили бороду. И нынѣ бывають у насъ священники, а навъть епископы, что носять бороду. Е навъть монахи латинского обряду, что носять зарость. Въ прочемъ не думайте, что бритя бородъ е звычаемъ чисто латинскимъ. Деякѣ епископы греческѣ зъ часовъ цѣсаря Юстиніяна, значиться изъ VI-го вѣка, зображенї на образахъ зъ бритими бородами та вусамы и зъ коротко стриженими волосями. Видно, что уже тодѣ бывъ такій звычай и въ греческій Церкви.

— Въ книжцѣ „Театронъ“, або „Позоръ исторический“, выданой въ Россіи за царя Петра Великого, читаеме, что въ часѣ пересліовань христіянъ за римскихъ цѣсаровъ, выйшовъ бывъ звычай, что священники брили бороду та вуся, такъ якъ се робила тодѣ римска шляхта, патриції, чтобы не рожнитися одъ нихъ и въ сей способъ устеречися пересліовань. Се дуже давній звычай.

А что до ношения довгого волоса на головѣ, якъ се носять російскѣ священники, то треба вамъ знати, что се не е давній, греческій звычай. Бывъ часъ коли въ греческій Церкви ношения довгого волоса на головѣ было священникамъ прямо забороненое. Греческій, трульскій соборъ зъ р. 622, якій греческа Церковь хоче навъть узнавати соборомъ вселенскимъ, дуже строго выступає противъ сего и каже, что носити довгое волоса вольно только тымъ священникамъ, якимъ епископъ за ихъ провини одобравъ сященичу власть. Соборъ сей уважавъ ношения довгого волоса карою.

3. Яка давна е вѣра, якоъ придерживаються Русини?

Бесѣду о. Петра перервавъ хворый. Онъ сказавъ.

— Что изъ того, что такъ было давнѣйше? Прецѣнь ваша гр. каѳол. вѣра повстала не давнѣйше, якъ триста лѣтъ тому. Передъ тымъ гр. каѳол. вѣры не было.

— Якъ то? одповивъ о. Петро. — Наша вѣра е доперва одъ 300 лѣтъ? То св. Іоанъ Золотоустий, св. Василій Великій и иншѣ не били нашоѣ вѣры и нашего обряду? Але се исторична ложь! Мы вызнаеме туту саму вѣру, яку вызнавали всѣ великѣ Святителї Церкви, мы придержуемся того самого обряду, что они.

— Наша вѣра, нашъ обрядъ такъ давнѣ, якъ давна е Христова Церковь, а кто говорить иначе, сей або сам не знає правды, або хотя знає, то скрыває еї передъ людьми и вдає, что не знає. Пречѣнь уже въ самыхъ початкахъ вытворилися въ Христовой Церкви два голови обряды, одинъ на востоцѣ, греческій, другій на западѣ, латинскій. Были еще и ишѣ, поменшѣ та про нихъ нема что нынѣ згадовати. А мы русины, придержуемся той самої вѣры, яка была одъ початку христіянства и того самого греческого обряду, якій одъ самого початку розниувся въ Христової Церкви.

— Мы знаєме, что вы, члены россійскої Церкви, найгорше не-навидите нашу вѣру тому, что вы колись самъ выизнавали еї, а позднѣйше одреклися. Правда, что нема горшого ворога якъ сей, что покине свой народъ и пристане до иншого? Нема горшого ворога Церкви, якъ сей, что колись бывъ еї членомъ, а одтакъ одорвався одъ неї. Вы чули може, что турки брали христіянскихъ хлопцовъ и выхововали ихъ въ могамеданской вѣрѣ на то, чтобы изъ нихъ зробити найгоршихъ вороговъ Христової вѣры, яничаровъ якъ вольли кожду ишу вѣру, каждый ишій народъ, чѣмъ свой. Изъ своего смѣялися, своимъ гордили, свое проклинали и хотѣли, чтобы изъ него не остали нѣ слѣдъ на землѣ. Такъ робить нынѣ и россійска Церковь!

— Она зъ першу была такожъ доњкою католическої Церкви. Та покинула свою матерь и осталася еї ворогомъ, и найзвязятѣйшимъ той великої, прегарної еї галузы, что называється католическою, греческого обряду. Та чтобы забити въ собѣ грижу совисти, вы выдумаете на нашу вѣру, на нашъ обрядъ и народъ найогиднѣйшѣ выгадки, посуджуете насъ о найгоршѣ рѣчи. И то тыхъ ширыхъ Русиновъ, котрѣ будовали величавѣ Божѣ храмы въ первопрестольномъ Кѣевѣ, закладали школы, библіотеки, мали великихъ Святыхъ, якъ св. Теодозія, Антонія, а навѣть межи самыми князями, якъ св. Бориса и Глѣба. Сѣ нашѣ Святѣ! Они кость изъ кости нашої, они и нынѣ нашими заступниками передъ Божимъ престоломъ. Та ваша державна, россійска Церковь силою та подступомъ одорвала міліоны нашихъ братовъ одъ католическої Церкви и прилучила до себе, де ониnidѣють та гинуть. А Россійска Церковь цѣлу ненависть звертає противъ нашої Церкви, бо знає, яка небезпека грозить еї одъ св. Унії, знає, что голова каѳолическої Церкви, Климентій VIII. скавъ, что хоче навернути цѣлый востокъ до каѳолическої Церкви, а хоче се зробити якъ разъ черезъ Русиновъ и мы маєме въ Бозѣ надѣю, что се колись мусить статися, бо Христосъ скавъ, что мусить быти одно стадо и одинъ Пастырь.

— Я не виную россійского народу, что онъ обаламученый вашими учителями, вилять въ насть вороговъ, а нашу вѣру уважає неразъ горшою, чѣмъ жидовску, але найбы сей россійскій народъ зайдовъ до нашихъ церквей, почувъ нашѣ науки, почитавъ нашихъ книжокъ, тодѣ познавъ бы онъ правду, познавъ бы, де жие Христосъ! Тѣ вашѣ батюшки заслоняютъ передъ нимъ правду, зогаджують ему нашу вѣру. Знає добре россійскій рядъ, знають и вашѣ Владыки,

что велика частина вѣрниковъ россійскоѣ Церкви, а особливо тѣ, что признаютъ себе Русинами, радо навѣрнули бы ся до вѣры своихъ отцовъ изъ часовъ св. Володимира Великого и Ярослава Мудрого и тому робить все, чтобы изъ тоѣ давноѣ отцевскоѣ вѣры и слѣду не было въ цѣлой Россіи.

— До недавна не вольно было въ Россіи одправляти Службы Божоѣ по нашему обряду, не вольно греко-каѳолическому священникovi навѣть поѣхати до Россіи! Свободно было въ Россіи исповѣдати вѣру католическу по латинскому обряду, вольно вызнавати всѣ ишѣ якъ: жидовску, могамеданску, буддійску, вольно всяку, хоть бы и найбольше поганску, а нашоѣ не вольно.

— Якъ той сынъ, кто прожене матѣрь изъ хижи за то, что она ганила его злѣ поступки, потомъ всѣмъ позволить приходити до себѣ въ гостѣ, хоть бы и зовсѣмъ чужимъ, а свою матѣрь, коли бы хотѣла зайти, затровить псами, такъ и вашъ Россійскій рядъ, такъ и вашъ тѣ, что держать власть у своихъ рукахъ, выгнали матѣрь кто имъ дала христіянское житія изъ своеї хаты, еще и гнѣваются на ню.

— Такъ, котрѣ хотѣли держатися своеї матери, католическоѣ Церкви, въ Сибирію гнали, якъ роботниковъ. А чому? Бо боятся правды, бо на нихъ здѣстнуються слова Спасителя, что люди полюбили темноту, а ненавидять свѣтла, чтобы при его блеску не показалися ихъ поганѣ дѣла. Знаютъ, что среди вѣрныхъ Россійскоѣ Церкви еще не зовсѣмъ загинули давнѣ спомини, коли то они належали до правдивоѣ Христовоѣ Церкви, а знаютъ такожъ, что до ихъ сердця нѣчимъ такъ щиро не промовить якъ давнимъ, прадѣднымъ, греческимъ обрядомъ, якого держимеся мы. Най бы такъ нашѣ руськѣ, католическѣ священники пошли межи руській народъ, что живе на Українѣ, Бѣлой Руси, Подолі, най бы заговорили до него его родною мовою, най бы пригадали ему тогдашнѣ часы, коли онъ належавъ до католическоѣ Церкви, най бы поучили его правды Христовоѣ вѣры, а тодѣ міліоны „православныхъ“ та старовѣрцовъ вернули бы ся до давноѣ, каѳолическоѣ вѣры, до отцовскаго, греческого обряду. Та сего якъ разъ найбольше боится россійское правительство. Боится, чтобы народъ не прозрѣвъ, не познавъ де Христова правда.

Отецъ Петро говоривъ щиро, ажъ запальтовався, а хворый дивився, не спускаючи зъ него очей.

— Та я не обстаю за нашимъ рядомъ — сказавъ тихо — я не хочу быти ворогомъ правды. Я и самъ досить натерпѣвся одѣ нашихъвластей.

— Я и кажу, что вы тому не виннѣ, что васъ такъ учать — говоривъ дальше о. Петро. — Вашъ учитель суть тыми, про якихъ говоривъ Іисусъ Христосъ, что взяли въ своѣ руки ключъ розумѣння, замкнули Царство Боже и самъ тамъ не ходять и не дають войти другимъ.

— Та мы довго разговорилися, а Вы еще слабѣ. Дасть Богъ дождатися вольного часу, то и поговориме довше, а я Вамъ розкажу, что мы, Русины греко-каѳолического обряду, дѣти тоѣ самої вѣры, яку принявъ нашъ киевскій великий князь св. Володимиръ.

По сихъ словахъ попрашався о. Петро зъ хворымъ и одойшовъ.
(Продовження слѣдуе.)

Нашъ листы.

Слава Іисусу Христу!

Дорогій брате! Правъ одну исторію читавъ емъ одъ св. Августина, коли принесли мнѣ твой листъ зъ почты. Св. отець розскажуе, что оденъ дуже ученый поганскій бесѣдникъ им. Викторинъ обманьовавъ одного мученика им. св. Симплиціяна кажучи:

„І я вашъ чоловѣкъ; увидишъ, я еще умру якъ христіянинъ“. На что мученикъ помахавъ головою и каже:

„Я того не вѣрю, доки не буду тя видѣти въ нашей церкви!“

— „Та чо? — продовжавъ язычникъ — „у васъ стѣны церковнѣ здѣлають чоловѣка христіяниномъ?“

— „Я не такъ розумѣю, что стѣны, — переберае слово Симплиціянь, — но знаю, что Господь Іисусъ кожого напоминає: что кто отречеся Его передъ людьми, того и онъ отречеся въ царствѣ небесномъ!“

Кто любить до церкви, до Божого дому ходити, тотъ выдає изъ себе свидѣтельство, что любить Іисуса, любить свою вѣру, любить своихъ близкихъ. Въ церкви сходиться и богатий и бѣдный, и панъ и Иванъ. Тамъ поднесуть до Бога взаемну молитву оденъ за всѣхъ, а всѣ за одного. Тамъ Христосъ меже нами. Самъ урѣряє нась, что где зайдуться двое, або троє въ имя Его и онъ межи ними есть. Въ домѣ Божомъ нась научать черезъ св. проповѣди, якъ то Христосъ приказавъ, что: „Проповѣдайте Евангеліе всей твари“. А на олтарѣ повторяєся животъ Спасителя, тайна вечеря, жертва крестна. Вѣра наша укрѣпляєся. Сесь молитви, жертви, присутность Іисуса Христа въ найсв. Евхаристії посвятять totы стѣны церковнѣ.

Твоихъ тамъ схизматиковъ батюшки выучили говорити, чтобы казали, якъ Викторинъ, что: „Менѣ не треба церкви, я вашъ чоловѣкъ. Бога повсюду можъ умоляти. Я подъ сливою еще смачнѣйше помолюся, якъ въ церкви...“

Мы и не суперечиме, что можно Бога всюды умоляти, лишь то бымъ радъ видѣти, что тѣ, котрѣ и подъ сливою хотять молитися, ци дѣйстно моляться, або лишь говорять въ вѣтеръ. Най бы молилися они окреме, на особенному мѣстѣ, лишь кобы молилися. Знаєме, что Іисусъ Христосъ многоразъ молився на особенному мѣстѣ, зовсѣмъ окреме. Такъ на пр. въ пустынѣ; на Таворѣ, коло гроба Лазаревого, въ загородѣ Гесеманской и пр. Але и то видиме, что Богъ уже Мойсеови приказавъ въ пустынѣ устроити окремѣшний будинокъ для Богослуженія. И Господь Іисусъ, Преч. Дѣва Марія, кожого года ишли до іерусалимскої церкви. Въ церкви учивъ уже якъ 12 рочныи малчикъ и позднѣйше якъ пророкъ въ праздникахъ пасхальнихъ.

Что теперь нашъ братя одрѣкаються одъ церкви, то робота батюшковъ. Они забивалися насильствомъ до нашихъ церквей, и выпудили вонтамъ вѣрючихъ. Изъ домовъ Божихъ зробили „вертепъ“. Коли получилисьме назадъ забранѣ ними церкви, смутно было видѣти якъ спустошили, въ якомъ смѣтю, непорядку, безъ Евхаристії

лишили старѣ храмы Божї. На пр. Бедевля, Вульховцѣ, Калины, Кривое, Руськое и пр. Паны, жандармы, (комиссія) соблазнилися надъ ихъ роботою. Дѣйстно: шизматицкѣ батюшкн лишь стѣны лишили. И за то говорять слабовѣрнѣ: „Мы тамъ не идеме. То лишь стѣны!“

Брате! Мы ходїмъ радостно до церкви. Здѣлаїме ю тымъ, чимъ была: церковю. Благодарїмъ Бога, что дали ю намъ назадъ. Эъ псалмистомъ веселѣмся:

„Возрадовахся о рекшихъ мнѣ а въ домъ Господенъ пойдемъ!“ Такъ исповѣдуйме нашу правдиву вѣру, бо Христосъ такъ учить: „Іже йспокїсть ма предъ члкїки“ (рорумїешь? передъ чоловѣки каже — а не передъ букомъ, дубомъ, орѣхомъ, ци тамъ подъ сливою) „Ісповѣмъ єго и ѿзъ предъ Оцемъ м旣мъ йже на нѣкесѣхъ“ (Мат. 10., 32).

Въ домъ Божомъ эъ вами разомъ молитися про наверненіе збаламученыхъ нашихъ братовъ схизматиковъ.

Вашъ другъ:

о. Ермолай.

Пахучча фіялка и вонячій грибъ.

Дивна то квѣточка, что зовеся фіялка. Малисенька собѣ, укрыєся подъ зеленымъ листочкомъ и не видишъ еѣ. Та милый запахъ розноситься кругомъ неѣ и роскошю наповняе всѣхъ, котрѣ до неѣ зближатся.

Такою пахучою фіялкою въ городцѣ Божомъ маешъ быти и ты, брате солодкій и сестро въ Христѣ. У тобѣ гадковати треба на се, чтобы своимъ богобойнымъ, праведнымъ житіемъ свѣтити другимъ добрымъ примѣромъ и заохочовати до богоугодного житія. На сей обовязокъ давати близкимъ добрый примѣръ пригадуе намъ Божественный нашъ Спаситель словами: „Тако да просвѣтится свѣтъ каїшъ предъ чловѣки, якѡ да відять добра вѣща дѣла и прославлять отца каїнаго, йже на нѣкесѣхъ“. (Мат. 5., 16). Сей обовязокъ тяжить на насъ усѣхъ крещеныхъ: старыхъ и молодыхъ, мужахъ и жонахъ, легиняхъ и дѣвчатахъ.

А чому — позвѣдаешся, може — треба намъ давати другимъ добрый примѣръ? А се тому, солодкій мой, что мы туй на земли не живеме особлякомъ, але межи людьми. А сѣ люде не глухѣ и не слѣпѣ. У нихъ очи, и ними видять, что и якъ дѣлаеме, у нихъ и уха, тай ними чують нашѣ бесѣды. Якъ добрѣ говориме ци чиниме, то они собѣ заохочуються до доброго и сякъ росте Божа слава; а якже борони Боже злое робиме ци бесѣдуеме, то и они собѣ учаться одъ насъ подлое говорити и дѣлати и такимъ чиномъ розширяеся образа Божа, грѣхъ. Сяка бо уже природа чловѣка, что больше иде за примѣромъ, якъ за словомъ. Не поможе наука слова, если не додашъ до неѣ науки примѣромъ. И найкрасшое твое слово не пріймется въ ближномъ, если твое житіе не буде отвѣтовати своей на-

уцѣ! Памятайме на се добре всѣ, а передовсѣмъ старшѣ! Най молодишъ учаться одѣ на съ доброго, Богу угодного, а не грѣха и образы Божоѣ. Помагайме имъ краснымъ примѣромъ до спасенія, а не тягнѣмъ никого грѣшнымъ житіемъ на вѣчну загибель!

Знайдсшь межи христіянами такихъ якъ ся мила фіялочка, та на жаль бывають и такѣ, котрѣ подобнѣ до отровного вонячого гриба, который отровуе и забивае всю, что кругомъ него находится. А сякихъ вонячихъ поганыхъ грибовъ на жаль доста нынѣ намного жилося помежи крещеніемъ народомъ. Десь якъ бы по дожду повышростали и отровують сердця, розсъвають грѣхъ и образу Божу, тай занапашують безсмертнѣ душѣ. Такѣ отровнѣ грибы се газды, когрѣ подпирають корчениа стѣны, вытирають жидовскѣ лавы и складають свою кервавицу идолови пянства! Сякѣ мерзавѣ грибы то жоны, котрѣ свой языкъ отдали въ аренду сатанѣ и нимъ обговорюють, обрѣхують и обркадають своихъ ближныхъ зъ доброго имени и славы! Пльогавый грибъ и сякій легинъ, который своимъ крещеніемъ языкомъ говорить паскуднѣ бесѣды, спѣвае поганѣ пѣснѣ, або наговорюе другихъ на нечистоту! Некраснымъ грибомъ и сяка дѣвка, котра не хоче стерпѣти и розсъвае на всѣ боки якбы изъ пушки лайками и проклонами! Не пахуча фіялочка, але вонячій смертоносный грибъ и сякій, который має липкѣ пальцѣ и ломить сему заповѣдь и сей, который безъ потребы божиться, ци присягае, и сей, что выговорюе противъ св. вѣры, ци Христовоѣ Церкви, або тягне до ворожѣльцовъ! Яка доля чекає такихъ отровныхъ грибовъ на Божомъ судѣ, можешъ упознати изъ словъ Божественного Спасителя: „Гóре мѣрѣ отъ соблазнѣ! Гóре человѣкѣ, їмже соблазнъ приходить! Оунїкѣ быю бы ємѣ, да обѣжелъ жерновѣ осельскій на вѣмѣ єгѡ й потонетъ въ глубинѣ морстї“. (Мат. 18. 7. и 8). Гадкуй же, брате солодкій и сестро, чтобы се страшное слово не придавило тебе. Стягай по слову Господньому (Мат. 18., 8—10)., свою руку и ногу и око, найпаче же свой языкъ, абы ними другихъ не соблазняти и не стягати на свою душу чужихъ грѣховъ! Не будьме николи вонячими грибами, але измагаймese быти всегда пахучими, мнлыми фіялками!

21/I. 1927.

[Кефа.]

Въ оборонѣ вѣры.

Служба Божа. „Чому схизматики служать Литургію на квасномъ хлѣбѣ, а наша римско-грекокатолицка Церковь на опрѣснокахъ служить св. Литургію?“ Звѣдуються схизматики.

Отвѣтъ: До сего, чтобы Служба Божа важно кончилася, не отмѣнно треба хлѣба пшеничного, а не житнога, ячмѣнного ци такъ овсяника або изъ мелаю. Така установа Іисуса Христа и еѣ никто на свѣтѣ не годенъ перемѣнити. Ци той хлѣбъ буде квасный ци

безъ квасу, то се рѣчи не умѣяе, онъ всегда остае хлѣбомъ и важною буде Служба Божа, если сей хлѣбъ буде пшеничнымъ. На овсяномъ хлѣбѣ, хотяй бы ты его и не знати якъ наквасивъ, Службы Божоѣ кончити не можъ. На якомъ хлѣбѣ кончивъ Господь Іисусъ першу Службу Божу въ великій Четверть на квасномъ ци на опрѣснокахъ, не знати, бо Евангеліе о семъ нѣчого не згадуе. Може быти, что на опрѣснокахъ, ибо жиды въ дняхъ пасхальнихъ споживали виключно опрѣсноки. Певною е рѣчею, что въ великій Четверть употребивъ Іисусъ Христосъ пшеничного хлѣба и на немъ кончивъ першу Службу Божу. Св. Церковь Христова, ся едина, соборна (каѳолическа) и апостольска всегда учила, что до Службы Божоѣ належить употребляти лишь пшеничного хлѣба, бо се майважное, а ци онъ бывъ квашеный ци нѣть, се было подрядное дѣло. Де якій бывъ хлѣбъ, квасный ци опрѣсноки, на такомъ кончили Службу Божу, абы лишь бывъ пшеничный. Такъ было на Востоцѣ и на Западѣ. Помало на Востоцѣ принявся звычай отправляти Службу Божу на квасномъ пшеничномъ хлѣбѣ, а на Западѣ переваживъ звычай кончiti еѣ на опрѣснокахъ. Одно и другое е добро и святое. Св. Василій, Золотоустый, Григорій, Богослов и Аѳаназій кончили на квасномъ, хотяй не были схизматиками, але каѳоликами, и не метали камѣньомъ клеветъ тай не осуждали своихъ братовъ латинянъ, котрѣ кончили на опрѣснокахъ. Нынѣ тоже св. Церковь и каѳолики латинскаго обряду не осуждаютъ восточныхъ за се, что они употребляють до Службы Божоѣ квасного хлѣба и мы греко-каѳолики кончиме свободно св. Литургію на квасномъ хлѣбѣ усяды на востоцѣ и западѣ, навѣть во самомъ Римѣ и то на гробѣ св. Петра. Никто изъ вѣрующихъ сыновъ св. Церкви симъ не соблазняеся и одень другого не осуждае. Найже сего не чинять и одступники. Схизматикъ, хотяй бысь его цѣлого намочивъ въ квасѣ, не перестане быти одступникомъ отъ св. Церкви Христовоѣ, пока не прийме непоколебимоѣ правды св. вѣры, что Римскій Отецъ е наслѣдникомъ св. Петра и намѣстникомъ Іисуса Христа тай видимымъ Головою единоѣ, святоѣ, соборноѣ (каѳолическоѣ) и апостольскоѣ Церкви! Молѣмся, солодкѣ братя и сестры, чтобы нашѣ одступники вивергли изъ сердца квасъ злобы и грѣха, порозумѣли Христову истину и подчинилися св. установѣ Христа!

[Богомолець.]

❖ Мѣсячное намѣреніе на Фебруарь ❖

„Чтобы молодежь змагалася чторазъ то больше заховати чистоту и невинность сердця“.

Минувшого мѣсяця молилисъmesя, чтобы устало дикое гоненіе христіянъ въ Мексику. Благалисъme Бога небесного, обы зволивъ просвѣтити и вразумити сихъ новомодныхъ Нероновъ, котрѣ дорвавшися до власти, кинулися на Христове стадо, абы его разбити и погубити. Просилисъme Бога милосердного о мужество и вытрева-

лость для братей и сестеръ нашихъ, которымъ приходится свою св. вѣру притвердiti терпѣнiemъ а тоже и мученичествомъ. Въ семъ мѣсяцѣ преважное дѣло маеме поручати Пресолодкому Сердцю Божественнаго Спасителя нашу христіянску молодежъ. Молодежъ — каже пословиця — се надѣя народу. Чія молодежъ, сего будучность! И оно правда! Якимъ кто за молоду, такимъ звычайно лишаesя и на старшѣ лѣта. Куда деревину молоду нагнешъ, туда и рости буде. Чимъ горнецъ накипить кажуть люди, — тимъ и черепъ чути. Знаютъ се добрѣ Божѣ вороги, новѣ безвѣрнѣ поганцѣ, и для того намагаються всѣми способами одтягнути нашу христіянску молодежъ одь Бога и Христа, а зробити еѣ безвѣрною поганскою. У нынѣшныхъ часахъ ведеся завзята борьба о молодежъ межи Господомъ Іисусомъ а Христовыми ворогами. Господь Іисусъ хоче надѣю народовъ и св. церкви молодѣ цвѣты згромадити коло своего Пресвятого Сердця, абы ихъ своею небесною освѣтити правдою, збогатити своею святою благодатю, Божою любовію, ихъ сердця загрѣти, абы ихъ ублагороднити, ущастливити и ихъ кроки звернути до небесної нашої отчины, до вѣчного непереминяющаго щастя.

Князь сего свѣта, сатана и его помочники лукавѣ люди, намагаються нашу крещену молодежъ отровити безвѣріемъ и грѣхомъ. Они закрываютъ передъ нацими молодцями и дѣвчатами небеснѣ, вѣчнѣ добра, до которыхъ каже намъ Господь звертати свое сердце и руки (Мат. 6., 20.), а въ яскравыхъ принадныхъ фарбахъ показують имъ земское, пустое, переминяющее. Въ ихъ сердцахъ измагаютъ згасити огень любви до Бога, а заскѣпили привязаніе до того, что небезпечное, грѣшное. Сатана и его высланники заставляютъ на невинну нашу молодежъ свої погубнѣ сѣты и зводять еї изъ дороги Божої, на дорогу грѣха и беззаконія. Не лише по городахъ, але и по селахъ заставляютъ на нихъ свою сѣти. Въ городахъ выдираютъ нашимъ молодцямъ и дѣвчатамъ вѣру и невинность го-театрахъ, кинахъ, балахъ, по модныхъ бовтахъ; на селахъ пропадае наша молодежъ черезъ безбожнѣ новинки, музыки, корчмы, грѣши-товариства.

Люди, которымъ на сердцю лежить Божа слава и спасеніе безсмертныхъ душъ, зъ страхомъ позираютъ на сесю діяволску роботу, на сю нагибелъ надѣю нашої, и обдумуютъ способы, якъ бы то ратовати нашу молодожъ передъ неминучою загибелю. Продумує надѣсимъ и Христовий намѣстникъ, найвысшій пастырь Христового стада и разъ у разъ накликуе христіянскихъ молодцовъ и дѣвчатъ до Христа, до Его науки, до Его Сердця. Притомъ якъ взоръ до наслѣданя показує нашей молодежи сихъ святыхъ молодцовъ, котрѣ у молодечихъ лѣтахъ пошли за голосомъ Іисуса, заваровалися передъ подступами сего поганского свѣта и працюючи зъ Божою ласкою уже въ молодыхъ лѣтахъ осягнули велику святость и высокій степень въ небесномъ царствѣ. Сѣ взоры и покровителъ молодежи суть: Св. Иванъ Берхмане, Алойзій и Станиславъ. Всѣ они блестяще якъ чистъ яснѣ діаманты невинностю сердця, св. чистотою. Для еї збереженя въ молодыхъ лѣтахъ идутъ въ монастыри. Еї сокотять

якъ найбóльшого скарбу. Въ еѣ обронѣ не жалують нѣчого. Черезъ нею подобалися Божому Сердцю и якъ чистѣ леліѣ зостали пересадженѣ до небесноѣ вѣчноѣ загороды.

Мы, члены Апостольства молитвы, просѣмъ горячо Христовое Сердце, чтобы зволило заваровать нашу молодежь передъ подступными сѣтями грѣшного свѣта, чтобы научило ихъ цѣнити высоко небесну перлу чистоты, чтобы допомогло имъ заховатися невинными, несплямлеными нечистымъ грѣхомъ черезъ цѣлый животъ, чтобы вся наша руська молодежь, хлопцѣ и дѣвчата, по городахъ въ по селахъ жили чисто, свято, праведно, тай выросли на добрыхъ святыхъ сыновъ и дочекъ своего народа и св. Матери Церкви!

ИЗЪ СВѢТА И ЦЕРКВИ

Уратовала житье будучого священика. Карло Анне, богословъ изъ Франціѣ занедужавъ въ 23. годѣ житя на грудну хвороту (сухоты). Было се 1906 года. Кончивъ девятницю до Матери Божоѣ въ Лурдѣ черезъ заступництво сестры Тересы. Нѣчо не помогало. Тогда зъ повнымъ довѣріемъ зачинае девятницю въ честь „малоѣ святої“, чтобы тѣмъ красше выявилося еѣ заступництво. Горячка (зима) лишила его. Лѣкарь, котрый очѣковавъ скору смерть хворого, пересвѣдчився, что хвороты цѣлкомъ нестало. Насвѣтленя луچами Рентгена не нашли нѣ слѣду тяжкоѣ хвороты на плюцахъ.

Се одна изъ чудесныхъ случаіовъ доконаныхъ черезъ заступництво св. Тересы одѣ Малого Іисуса розбираныхъ св. Конгрегацію Обрядовъ при беатификаційномъ процесѣ.

А ци ты брате солодкій и сестро, просивъ уже Бога небесного о то черезъ тую Святу? Попробуй! Чей и для тебе найдеся яка косиця у небесныхъ загородахъ!

Св. Тереса отъ Малого Іисуса уздоровила. Сестра Королья, монахиня Уршулянка въ Люблянѣ, пише про себе дня 23 юнія 1926 года, ось такое: „Больше роковъ была я хвора на легки. Можна было дogleянути всѣ обявы сухоты (чихотки) якъ: горячкованье, ноchnѣ зноѣ и плюванье кровію. Лѣкарѣ заявили, что для мене не е ратунку, бо легки были уже дуже погубленѣ. У своей бѣдѣ и несчастю звернулася до св. Тересы одѣ Малого Іисуса и просиламъ еѣ о помочь словами: „Сестричко моя, Ты одна можешъ менѣ помочи.“ Сейчасъ такой зачаламъ на честь малоѣ Святоѣ (якъ еѣ всѣ клачуть) девятницю и въ ночи одѣ 6. на 7. дециембра 1918 года по тяжкой кризѣ я цѣлкомъ подужала. Лѣкарѣ оглянувъ мене дуже точно и не могъ выйти изъ дива, что ни слѣду не остало изъ тяжкоѣ хвороты. Одѣ того часу не потребую лѣкара. Яко учителька сейчасъ пошла я у школу и чуюся далеко лѣпше якъ колись передъ недугою“.

Отсе одинъ изъ многихъ случаювъ чудесноѣ помочи черезъ заступництво молоденькоѣ святоѣ монахини Тересы одъ Малого Іисуса. Сама она передъ смертю обѣцяла, что зъ неба буде спускати обильный дождь рожъ, и сповняе свою обѣтницю численными чудами, якъ по всѣхъ усюдахъ черезъ ню дѣются. Дасть Богъ другимъ разомъ розкажеме еще про іншій чудесный случай еѣ могучого заступнищства. Звертаймесь и мы у своихъ журбахъ до сеѧ Божоѣ угодницѣ, чтобы середъ сихъ тяжкихъ хвиль, котрѣ теперь переживаеме, и на нашу несчастну руську краину послала обильну росу Божихъ ласкъ, абы выполола куколь схизмы и безвѣря, абы мы всѣ непохитно держалися Христа Господа и святоѣ Его Церкви!

ДОПИСИ

Высокопреподобный Отче Редакторъ „Благовѣстника“
Ужгородъ.

Якъ ревный читатель „Благовѣстника“ зъ почтеніемъ посылаю Вамъ одну частку изъ проповѣди, яку державъ батюхъ „protoerей“ Вархоль, схизматицкій попъ въ Береговѣ на другій день праздника Рождества Христового:

„Мати Божа, св. Іосифъ зъ новорожденнымъ Іис. Христомъ утѣкали изъ Вифлеема до Эгипта, чтобы передъ гнѣвомъ Ирода Іис. Христа спасти могли . . . Уже вечеръ бывъ, коли св. Родичѣ пришли близъ Эгипта зъ сыномъ Божимъ, якъ стрѣтилися зъ двома разбойниками. Одинъ разбойникъ говорить до нихъ: „Ой дуже красна е сія дѣтина, будто одна царска дѣтина не може красша быти“. — Другій разбойникъ говорить: „Я васъ убю въсѣх! Хиба такъ Вамъ животъ дарую, если та жона (Пр. Дѣва) поплекать мою дѣтину, котра е дуже хвора“. Св. Родичѣ про се дуже настрашилися, и въ сей нуждѣ Пр. Дѣва пошла въ домъ разбойника, где нашла жону разбойника дуже хвору зъ ранами на персяхъ а дѣтину, котра по цѣломъ тѣлѣ мала дуже огидливѣ раны. Пр. Дѣвы сію дѣтину поплекала, и она заразъ выздоровѣла“.

Понеже сію казку не читавъ я ни въ св. Писмѣ, ни въ святыхъ книгахъ, про се прошу госп. Редактора, будте ласкавѣ въ „Благовѣстнику“ менѣ отвѣтъ подати, что есть изъ той проповѣди правда,
Съ почтеніемъ: П. К.

* * *

Примѣчаніе и отвѣтъ. Вы самѣ уже добре оцѣните дѣло, коли про сю проповѣдь пишете, что казка. Нигде у св. Письмахъ ничего не читати. Але до того, чтобы казати добру проповѣдь, треба кончiti богословскѣ школы, а не коло коней або свиней приготовитися до посвященя. Нашъ батюхи говорять еще не такъ дурницѣ, якъ ваша „protoerей“. Можно бы изъ нихъ звязати красну китицу.

Почтена редакція „Благовѣстника“

въ Ужгородѣ.

(Карапы хвалять мадяровъ).

Прошу хвальну редакцію, дати сей статъ мѣсто въ первомъ числѣ сего года, то есть въ фебруарѣ, або передати газетъ „Свобода“, ибо не могу стерпѣти, чтобы не дати тымъ богохульникамъ отвѣта, котрѣ хулять и ругаютъ нашу едино-спасительну гр. каѳ. вѣру.

„Слава въ вышнихъ Богу и на земли миръ“, такъ спѣвае наша св. мати каѳ. церковь на праздникъ Рожд. Господа Іисуса Христа. Такъ спѣвали и ангелы въ Вифлеемѣ и такъ спѣвае свя вселенна.

Зъ гасломъ мира приходять и газеты христіянскѣ и привѣствују ѹ своихъ читателей на порозѣ нового года. Всякій чоловѣкъ старався, что найлѣпше и побожнѣйше зъ своими другами обходити сей великій праздникъ желающи другъ другу мира любви и всего доброго.

Но не такъ робить газета схизматиковъ „Русская Земля“. Не зъ гасломъ мира прїшла она на праздникъ Рождество межи ѹ своихъ читателей, но мѣсто любви и мира, повна она богохульными клеветами и ненавистю до гр.-каѳ. вѣры, Рима и св. столицѣ. На початку хватаютъ еѣ страшнѣ корчовѣ болѣзни, что встыдно Карп. Руському народу, чтобы мадяре восхващали царствіе Божое. А народъ Карп. Руській томится въ Римской неволи и въ Ватиканскихъ папскихъ заблужденіяхъ; мадяре принимаютъ православну вѣру „какъ отрадно видѣть пробужденіе христіянской совѣсти у мадяръ“. Потому читай письмо до Кума Гната, тамъ найдешъ: смѣтя Австро-мадярское, нѣмецкое, италійское, украинское, Римское, уніятское и пр.

Видите любезнѣ читателѣ, что якимъ жаркимъ огнемъ мече сеѧ схизматицка газета на всѣхъ тыхъ, котрѣ не идутъ за ихъ командою.

Уже не знаютъ якъ дурити людей, ибо знаютъ добрѣ, что якъ свидѣтельствую ѹ нихъ тоты ссла, что уже вытверезилися изъ Фотіянскої схизматицкої ереси. Вел. Лучки будуть примѣромъ ихъ любви, прото пробуютъ еще даякъ такъ думати, что и мадяре принимаютъ схизму. Но дармо дурить уже газета „Р. З.“, уже не такъ легко народъ дастъ себѣ извести, бо уже видить вашъ плодъ если не изъ іншого, то хотя изъ вашего послѣднаго числа (51, 52).

Руській народъ уже порозумѣвъ и порозумѣє лѣпше, что у васъ вшиткое смѣтя окремъ фотіянскої ереси.

Прїде часъ, что названое вами „смѣтя“ римское уніятское возвисится а вы панове изъ Руськой Землѣ котрѣ ёсте хлѣбъ руського народа, (за что мали бысьте благодарнѣ ему быти, а не сѣяти вражду и богохульство), будете утькати якъ „таетъ воскъ одъ лица огня“. Желаеме вамъ, чтобысьте не пайшли нигде инде помочи, якъ у тыхъ мадяровъ, что такъ хвалите ихъ.

Гукливо, дня 12/I. 1927.

Зъ почтенiemъ

Михаиль Козикъ.

Пане Редакторе!

Смѣренно прошу пару словъ моихъ помѣстити
въ нашомъ Благовѣстнику.

Нашъ нещастный Мараморошъ еще усе не хочеся покаяти, еще
узе не хоче дознати то, что тотъ зводитель „новъ Апостолы“
вшитко за шефтъ, за хосенъ дѣлають. Въ нашомъ селѣ двѣ церкви
суть, но изъ кураторства верженому по имени Петръ Поповичу то
не доста. Переступивъ на схизму, напротивъ нашей церкви продавъ
свой телекъ „святыму Православному комитету“ за добрѣ грошъ,
где они почали най ся неприказуе „Православну“ церковь будовати
изъ дерева.

Пару дней тому назадъ одень головный майстеръ, членъ сего
нешастного комитета нашего отця духовного изъ школы до мона-
стыря идущого, паскудно образивъ. И что ся стало? За пару
годинъ сей неборакъ такъ несчастливо упавъ, якъ кажуть изъ дугнѣ,
что костки поламавъ у собѣ и по словамъ доктора ледвы буде жити.
Теперь повезли го до Севлюшскаго шпиталя.

Видите у семъ Божу кару. Познайте, что зъ Богомъ не можъ
тѣгатися, а изъ Его праїлої вѣры смѣховатися. Лишѣ блудъ,
не дайте известися, чужинцами котевъ за хосенъ роблять то.
Женьте ихъ вонъ, най идуть тотъ народъ губити, который уже
лѣпше загубити не можъ. Намъ уже спокой треба.

Хустъ-Боронява, 23. XII. 1926. **Православный христіянъ
а не схизматикъ.**

Укрѣпляйме христ. фронтъ. Религійна борьба ведеся головно
въ газетахъ. Безбожнѣ коммунисты и схизматики постоянно напада-
ютъ на насъ печатанымъ словомъ и воюють въ газетахъ противъ
Христової Церкви. Газеты ихъ розширенѣ межи христіянами и
много душъ одорвали уже одь Христа. Противъ злыхъ газетъ треба
войовать христіянскими новинками и книжками! Хвала Богу и у
насъ е уже христіянска пресса. Благовѣстникъ, Свобода, Душпаstryr
(для священиковъ) Русское Слово (въ Пряшевѣ) на первомъ фронтѣ
воюють за Христовѣ думки и идеї. Сѣ газеты подпоровати е по-
винностю каждого христіянина русина. Кто може най предплачуе
на нихъ; если не е въ силѣ, най зберугъся двое трое и такъ най
зложать потребнѣ гроши. Члены читалень най пожадаютъ, чтобы въ
читальняхъ были всѣ христіянскѣ газеты! Лишь тогды зостане Подк.
Русь христіянскою краиною, если буде мати сильну христ. прессу.
Иншакъ запанують схизматики и безбожнѣ коммунисты.

Читайте лишь „Благовѣстникъ“!

НОВОСТИ

Въ Ирландіи (каѳолицкій край) зачали върнѣ сыны св. Церкви рѣшучий, завзятый бой противъ порнографіѣ (неморальность, погань) въ литературѣ, по театрахъ и кинахъ. Правительство созѣдало окрему „Комисію противъ злѹ (паскудноѣ) литературы“. Здалобыся уже и у насъ выступити остро противъ поганыхъ, неморальныхъ писемъ и представлень, которыми обдаровують нашъ народъ културнѣ нашъ сусѣди изъ западу. Звѣсное дѣло, что „чимъ хата богата, тымъ рада“.

Въ Китаю (Хинахъ) каѳолицкѣ миссіонарѣ удержуютъ властными силами ажъ два каѳолицкѣ университеты (найвысшѣ школы). На обохъ е по колъкасотъ студентовъ. Подъ короткимъ часомъ мае быти основаный третій университетъ въ головномъ городѣ Китаю, Пекингѣ. — Чія школа, того будучность! Тому то и у насъ всякѣ безвѣрки и поганцѣ лѣзуть у школу, чтобы опоганити нашъ вѣруючий руській народъ! — „Не дадите склата мъсомъ“, каже Господь. (Мт. 7, 6).

Возваніе Центр. Канц. Об. Вѣры къ оо. духовникамъ и гр. каѳ. руському народу. Той фактъ, что поліційный урядъ въ згодѣ зъ Цив. Управою въ Ужгородѣ выповѣвъ перебыванія о. Решетилови, ревному нашему миссіонареви, збуривъ цѣле гр. каѳ. населенія Подк. Руси. Изъ сеѧ нагоды Центр. Канц. Об. Вѣры выдала

друксорты и текстъ протокола для протестації. Мы окреме возываеме нашихъ читательовъ, чтобы подписали съ протоколы и симъ способомъ заявили свой протестъ противъ насильственного поступованія полиціѣ Цив. Управы. Шкандалъ на цѣлый свѣтъ, что уряды дозволяютъ всякимъ неграмотнымъ батюшкамъ перевертати туй спокой и миръ межи людьми, а такому интеллигентному миссіонареви не дозволяютъ будовати консолидацію и любовь христіянску. Се посланіе Цив. Управы свѣдомый христіянинъ русинъ николи не може забыти. Туй е пора, запротестуйме и увидиме что стоить передъ пражскими панами голосъ христіянского руського народа!

Пражскій архіеп. Кордачъ въ свое мѣсто пастырскомъ посланію такъ напоминае родичовъ:

„Такѣ родичѣ, котрѣ своє дѣти ни на науку религіѣ ни до церкви не посылають, ограбляють Бога одъ дѣтей; ихъ грѣхъ е тымъ тяжшій, что дѣтина противъ сего и боронитися не може. Такѣ родичѣ сповняють великий грѣхъ и въ св. сповѣди не могутъ достати розрѣшенія, если не пообѣцяють поправлення своего. Такѣ родичѣ, котрѣ забороняють дѣтямъ своимъ ходити на науку вѣры, не могутъ быти похованы церковною правою“.


Строгѣ слова, але справедливѣ! Най розважає ихъ кождый христіянскій родичъ.

Схизматицкій епископъ Ириней пришовъ на Подкарпатя. Цѣль его прїїза е правдоподобно зорганизовать схизматицкѣ церковиъ приходы. Мы звертаеме увагу епископа Иринея на тѣ до неба вопіючѣ беззаконія и звѣрскѣ поступовавя, что греко-восточнѣ зробили противъ насъ и противъ нашоѣ Церкви. Но-винки пишуть, что Ириней е интелигентный и образований чоловѣкъ. Если такъ, тогды не може згодитися на то, что его вѣрники роблять и робили до теперъ. Дорога схизмы на Подкарпатю е засыпана кровю, слезами греко-каѳоликовъ и терроромъ, насильствіемъ схизматиковъ. Най знае Ириней, что тугешное правславіе, то е религійный комунізмъ, онъ оружіемъ правды и чести, але оружіемъ дикого террора и насильствія. Все то, что на Подк. Руси зробилося для розширеня православія, до того прилѣпилось не мало грѣху и беззаконія. Если Ириней сего не вѣруе, най выслушаетъ тыхъ гр. каѳоли-

ковъ, котрѣ въ терпѣніяхъ и мукахъ за Христову вѣру указалися подобными до першихъ христіянъ, або най прочитає рочники Благовѣстника. Въ каждомъ числѣ е чось такое, что не служить на славу „св. православія“. Най подивиться на ту товпу батюшковъ, котрѣ туй апостолують. Чи они такъ выглядають якъ тѣ, котрѣ миръ, любовь, згоду годнѣ проповѣдати? Надѣемсяся, что Вы, якъ интелигентна особа не довго булете радѣ „подкарпатскому православію“ и пойдете назадъ зводки пришлисте!

Большевики знесли супружій законъ. Большевики жиды, якъ захопили власть въ свої руки, знесли церковное супружество и ззвели лише державное. Минулого дніку поступили однимъ крокомъ дальше. Знесли и сецивильное супружество и высказали, что доста заявити на магистратъ, что оженився. Чоловѣкъ може брати собѣ столько женъ, сколько захоче. Се е поганскій способъ житія.

Короткѣ вѣсти. Въ Белгіи на сѣльскихъ выборахъ найбольше голосовъ мала христіянска партія. Соціалисты тяжко пораненѣ. — Французскѣ христіяне организуються; ихъ „Союзъ обороны хр. католиковъ“, мае 2.500.000 членовъ. На чолѣ союза стоить генераль Castelnau. — Найновѣйше выслѣдженю, что великій англіцкій писатель Шекспіръ бывъ каѳоликомъ. — Въ Бѣльградѣ намѣряють збудовати величезный католицкій храмъ Божій. — Дня 5-го децембра одбылося посвященя болгарского гр. каѳ. епископа Стефана Куртева въ Римѣ, въ базилицѣ св. Климента. — Дня 18-го дец. минуло 300 лѣтъ тому, что посвятили найбóльшій храмъ цѣлого свѣта, базилику св. Петра въ Римѣ. — Дня 14-то дец. святкова учит. сем. въ Пряшевѣ 70 лѣтній ювилей о. Ивана Кизака професора и заслуженого народного дѣяча и письменника. — Алексій Базюкъ е іменovanый постояннымъ епископомъ до метрополита Шептмцкого въ Львовѣ. — Въ Билгаріи въ парламентѣ предложили законопроектъ для запровадженя нового календаря.



„Свой до свого!“

„АКОРДЪ“

ПЕРІША РУСЬКА ФАБРИКА
ЗВОНОВЪ ВЪ УЖГОРОДЪ

Найлѣпшъ звоны править перша руська ліярня звоноў „АКОРДЪ“ Капиталь создали сами наши люде. Она заряджена по найновѣйшой техніцѣ и ведсна перворядными фаховцями. Мѣстности фабрики находяться около желѣзнодорожной станціи въ Ужгородѣ. Тамъ постоянно выставленъ образцовъ звоны. Найлѣпшій благородный металъ.

Спеціяльна марка „Акордъ“ „А“ и „С“ звоны. // 10-рочна гарантія.

Замовленя просимо адрессовати:

„АКОРДЪ“, ліярня звоноў въ Ужгородѣ.

Канцелларія: Ужгородъ, Капитульна улиця ч. 11.

— Замовленя можъ передаць и въ Дрогобычкомъ Району. —

РУСИНЫ!

Не идѣть до чужихъ, а подпирайтѣ своѣ руськѣ институції

СЛАВЯНЕ!

Першимъ руськимъ ассекураційнымъ товариствомъ есть

„БЕСКИДЪ“

акційное ассекураційное товариство — Ужгородъ.

Принимае ассекурацію хижъ и всѣхъ движимостей и недвижимостей противъ огня, противъ вломовъ, принимае ассекурацію на житѣе, пензій и пр.

на дуже выгодныхъ условіяхъ.

Ассекуруйте только у „БЕСКИДЪ“!

СВОЙ ДО СВОГО!

Глядаеме добрыхъ агентовъ.

КОГУТЬ и НАБИВАНЕЦЪ власный выробъ и складъ церк. знарядовъ
въ Ужгородѣ, Раковци улиця ч. 11.

ОБРАЗЫ до ношения
изъ бронзы додготованіемъ
внѣ конкуренціѣ
одъ 1400 до 5000 Кч.

ЧАШЪ постоянно на
складѣ одъ 350 Кч выше.
Золоченія старыхъ
чашъ только въ огнь
одъ 220 Кч и выше.

КРЕСТЫ одъ 80 Кч
и выше. Поновленія
старыхъ крестовъ одъ
40 Кч.

Практичнѣ касеты
до посвѣщенія хворыхъ
изъ крестикомъ, 2 свѣч-
ники, дароносительни-
ця, кропило, посудины
на вино, олѣй, жіюди.

Готовѣ ризы зъ приналежностями на складѣ въ великомъ выборѣ
одъ 800 Кч. // Плащаницѣ, Розпятія и проч.



ОБРАЗЫ на тетрапедѣ
олійною фарбою на
блясѣ, полотнѣ або дे-
ревѣ. Великій выборъ
люстръ (свѣтловъ)

одъ 750 Кч.

Лампы на олій одъ
240 Кч. Давайте од-
навляти люстры — бу-
дуть як новѣ.

Дарохранительницѣ
новѣ 350 Кч.

ЗАСТАВЫ готовѣ въ
каждой величинѣ, фар-
бѣ и матерії по май-
нившимъ цѣнамъ
одъ 780 Кч.

КАДИЛЬНИЦЪ одъ
200 Кч.

ИВАНЪ МИГОВКЪ, УЖГОРОДЪ
Раковци улиця число 16.

Поручаетъ свою, днешнимъ потребамъ совѣтно заосмотрену

ПЕРЕПЛЕТНЮ

котра принимаетъ всякѣ роботы входячѣ въ кругъ переплетни-
чого искусства, и выготовить ихъ солидно и модно за дешеву цѣну.

Церковнѣ, бібліотечнѣ и канцелярскѣ книги

принимаются для обновленія. Дальше можно до-
стати церковные Молитвенники, Евангеліи
въ красномъ шкуряномъ переплете, и инше.

Продае всякѣ молитвенники. :: Торговлямъ знижена цѣна.